

Opinion ta un seccion di **Bon Dia Aruba** specialmente pa brinda oportunidad na lectoran individual pa expone nan opinion. Contenido publica di ningun manera ta refleha opinion di **Bon Dia Aruba** y ta pa responsabilidad exclusivo di e organizacion/individuo cu ta ofrece esaki pa publicacion. **Bon Dia Aruba** ta reserva e derecho di no publica texto ofreci, si esaki segun e medio no ta cuadra cu e normanan di decencia cu nos ta mantene, pa evita contenido cu ta innecesariamente ofensivo. Esaki suheto na evaluacion exclusivo di **Bon Dia Aruba**.

OPINION



Skirbi pa Sra. mr. dr. Alida “Lily” Marval

Dia Internacional di Derecho di Mucha y Hoben

E articulo aki ta un reflexion riba e derechonan di mucha y di hoben. Dicon mester a bin cu un Tratado di Derecho di Mucha y Hoben? E proposito pa bin cu e Tratado aki ta pasobra tabatin hopi abuso di mucha y hoben cu for di chikito mester a traha pa yuda trece cuminda na cas.

Bay scol pa siña NO tabata existi y e cantidad di mucha y hoben cu no por a lesa ni skirbi tabata hopi grandi. Ainda nos por wak esaki na paisnan pover manera Haiti y varios pais na Centro y Sur America, na Bangladesh y na hopi pais di Africa y Asia. Cu otro palabra: tur caminda.

Nacionnan Uni (United Nations) hunto cu UNICEF a cuminsa cu e tarea di skirbi un Tratado unda cu lo ancla specialmente derechonan esencial manera e derecho di carga un nomber y fam, di ta ciudadano di un pais; di tin mayornan cu obligacion pa mantene nan yiunan, pa manda nan yiunan scol pa siña skirbi y lesa y di e manera ey combati pobresa. Derecho di ser atendi pa un dokter ora di bira malo. Articulan pa proteccion di mucha y hoben, manera NO maltrata nan, ni suta nan, derecho di descansa, come y drumi. E ta zona straño pasobra e derecho nan aki ta zona normal den nos horea. Toch tin HOPI mucha y hoben na mundo cu nunca a drenta un scol y nunca a haya les, cu no sa lesa ni skirbi.

Esey tabata y ainda ta e meta principal di e Tratado aki. Toch a dura mas cu 10 aña pa e Ley internacional aki ser firma pa mas o menos 100 pais pa e bira un Tratado, un Ley internacional. Dicon? Pasobra hopi pais a bisa cu nan tabatin mester di e forsa laboral di mucha y hoben pa nan economia. Paisnan manera India, China, paisnan na Africa, Sur America y Medio Oriente. Ora bo cumpra paña, wak riba e label unda el a ser traha. Bo ta bay lesa nomber di e paisnan menciona ariba. Pasobra nan ta paisnan unda masha poco placa ta ser paga, loke nos ta yama CHEAP LABOR.

E paisnan aki tambe ta discrimina mucha muhenan y hende muhe en general. Na Afganistan e mucha muhernan NO MAG bay scol pasobra na e pais aki y algun otro paisnan unda tin Islam como religion, mucha muhenan NO mag bay scol. Nan ta prefera di mata nan cu manda nan scol. E paisnan aki ta discrimina mucha muhenan y hende muhe en general. Por fin na 2001 e Tratado aki a bira realidad y e derecho di bay scol

a bira un realidad. Desde e momento ey situacion pa mucha y hoben a cuminsa cambia mundialmente. No tur cos pareu pero toch un cambio positivo. Ainda falta hopi cambio.

Con e situacion ta na Aruba? Na Aruba bo por bisa cu tur hende sa lesa y skirbi. Esey kiermen cu nan no ta analfabeto. Scolnan ta ser subsidia pa Gobierno y mayornan no tin di paga hopi manera na otro paisnan. Toch tin hopi maltrato di mucha y hoben na Aruba. Maltrato verbal, psicologico of mental manera: “bo no ta sirbi pa nada”, “bo ta handicap”, “bo ta bobo”, “bo ta mahos”, “bo ta pover” etc. Esaki ta ser bisa hopi biaha pa e mayornan, mama, tata, wela y welo y mas miembronan di e famia.

Nascol tin maltrato verbal pa medio di maestronan di scol cu tambe ta papia di mesun manera cu e alumnonan; bullying dor di otro muchanan. No tin respet, ta haci otro dolor usando palabranan ofensivo.

Den encuestanan haci mundialmente e sorto di abuso aki ta esun mas usa y mas doloroso pasobra e ta keda semper den bo mente y sentimento. E ta baha e estima propio di cada victima. Mucha y hobennan cu ta tende y mira e sorto di abuso aki lo haci mescos cu otro mucha y hoben. E abuso aki ta pasa di generacion pa generacion. P’esey e ta ser yama “e circulo vicioso”. Si mayornan ta uza palabra malo cu otro, of e tata ta dal e mama y visa versa y e yiunan ta wak e espectáculo aki, e chens cu nan lo haci esaki ora nan bira grandi y forma un propio famia, ta grandi. P’esey e abuso aki ta ser pasa di generacion pa generacion. Y p’esey e ta ser yama “violencia transgeneracional”.

E violencia aki hunto cu otro sorto di violencia manera violencia fisico y sexual, ta causa hopi daño emocional, fisico y mental y loke nos ta yama “trauma”. Esey kiermen cu e lo domina e bida di e victima pa semper. Abuso mental y sexual ta e abusonnan cu mas daño ta causa. Ya Aruba a conoce casonan unda mucha y hoben a ser mata. Y tambe casonan di abuso sexual.

Mi ta desea di dedica algun conseho na e mayornan pa combati e abusonnan aki. Wak con aboso mayornan ta trata otro. Cu respet? Of cu palabra malo, mahos y humiyante? Boso yiunan ta wak y tende boso. Boso ta “educando” nan den violencia. Nan ta bay haya e chempel malo ey “NORMAL” y lo haci mescos ora nan bira grandi. Mescos ta conta si nan wak boso bebe alcohol of uza

droga. Tin hogarnan na Aruba unda mayornan ta uza alcohol y/of droga y comparti esaki cu nan propio yiunan. Boso por rei con e muchanan aki lo bira ora nan yega edad di adulto. Si bo wak cuanto hoben di edad di 14 pa 20 aña ya conoce KIA paden, bo curason lo haci dolor! Siña papia na un manera respetuoso cu otro y cu bo yiunan. Splica nan kico ta malo y kico ta bon. Cu palabra, NO CU GOLPI. Na e hobennan mi conseho ta pa nan probecha cu na Aruba nan por studia y yega hopi leu. Haci bon uzo di esey. Prepara bo mes, bo bida y bo futuro.

Tin investigacion ta tumando luga pa haya sa dicon tin tanto maltrato di mucha y hoben na Aruba. Maltrato den famia. Loke nos ta yama incest, cometi pa propio miembronan di famia y hasta cu mucha chikito. Esaki mester cambia. Ban cuida nos muchanan y hobennan pa nan por haya e chens di sigui un bon estudio y alcanza un bon futuro cu un hogar bunita y harmonioso. No imita pa loco lo ke bo ta mira otro paisnan ta haci. Forma bo propio criteria, Respet bo mes, bay semper pa miho, pidi Dios proteha bo y cuida bo, pero na prome luga cuida bo mes y cuida bo curpa. Ban traha duro. Ban saca cosnan y custumbernan mahos for di nos bida. Ban biba saludabel, positivo. Tin tanto cos bunita, trata otro bon. Cu respet. Yena bo bida cu balornan manera respet y amor pa bo mes y pa bo prohimo. Lo bo mira cu bo bida lo cambia pa miho y abo ta bira miho hende.

Como reflexion final mi kier trece lo siguiente padilanti como muestra con vulnerable e derechonan di mucha ta y con facil esakinan ta ser trapa y viola. Merca ta keda un atraccion pa e paisnan di Centro America y hopi famia, mama y tata ta trata di drenta Merca buscando un futuro miho pa nan mes y nan yiunan. Den e ultimo 4 aña hopi di e migrantenan aki a ser debilbi pa nan pais, hunto cu nan yiunan. Pero algo desastroso anti humano y anti e derechonan di mucha a sosode. E muchanan chikito cu ta depende di nan mayornan a ser ranca y separa for di nan mayornan. Hokinan grandi di hero a ser traha y nan a ser cera manera cacho. Algun mucha a bira malo y a muri. Djis pensa con e criaturanan chikito a sinti y ta sinti di ser ranca for di nan mayornan. Y e dolor di un tata y mama pa laga nan yiunan indefenso atras. Loke ami ta haya hopi bergonsoso ta cu algun grupo pro defensa di derecho humano so y algun politiconan so na Merca a desapropa e accion aki.



Na Europa e reaccion tabata mas fuerte. Como e atake riba e hecho aki a bira mas fuerte den e reeleccion pa presidente biaha pasa, ordo a ser duna pa averigua si tur e muchanan tabata den e “foster-homes” unda nan a ser destina. E resultado? Mas di mita di e muchanan NO A SER HAYA. SPOORLOOS. Bo sa kico esey kiermen? Cu e muchanan aki probablemente a cay den mannan di hende malvado manera pedofielnan, prostitucion, sclavitud den trabaonan forzoso! Esey ta un dolor grandi y un berguensa pa henter HUMANIDAD. Ban wak kico ta bay pasa.

Como ultimo punto mi kier pone boso atencion riba e hecho cu Merca, e pais cu ta yama su mes mas democratico, NUNCA a firma e Tratado Aki. Dicon? Nan a uza 2 motibo clave pa nan: 1. Nan NO kier pa ningun hende ni un Tratado bisa nan con pa trata nan hende, specialmente nan yiunan. Esaki tin di haber cu maltrato y batimento di mucha ta prohibi. 2. Merca kier mantene e posibilidad di por checuta (MATA) un menor di edad na nan Pais. Esaki a yega di sosode. Tin un caso cu un mucha homber di 11 aña, color scur, a ser checuta pasobra un compañerita di scol y di color blanco a bisa cu e mucha homber aki a molosti’e sexualmente! Probablemente e a ripiti loke e tabata tende den su circulo di famia unda tabatin discriminacion.

Hopi aña despues, e mesun mucha muhe aki a haya remordimento y a confesa cu loke el a bisa NO tabata berdad. Awor nos tin DNA pa confirma cu esaki NO tabata berdad. Ken por kita e dolor di su mayornan? Djis sinta pensa. Anos, un isla chikito NO tin PENA DI MORTO den nos Constitucion! Por fabor: CUIDA BOSO YUINAN.